

28 AUG 2003

Megawati-penyeludupan (bergambar)

INDONESIA MALAYSIA TINGKATKAN KERJASAMA CEGAH PENYELUDUPAN

KUCHING, 28 Ogos (Bernama) -- Presiden Indonesia, Megawati Soekarnoputri hari ini berkata Indonesia dan Malaysia akan mengadakan kerjasama lebih erat untuk mencegah penyeludupan di sempadan kedua-dua negara.

Beliau berkata ia termasuk penyeludupan manusia, senjata dan kayu balak.

"Itulah kita mahu selesaikan masalah pertindihan sempadan antara Indonesia dengan negara jiran termasuk Malaysia, supaya bisa (boleh) meredakan masalah penyeludupan," katanya pada sidang media selepas mesyuarat rundingan tahunan antara beliau dengan Perdana Menteri, Datuk Seri Dr Mahathir Mohamad di sini.

Antara Menteri dari Malaysia yang menghadiri mesyuarat kali ini ialah Menteri Luar, Datuk Seri Syed Hamid Albar, Menteri Pertahanan, Datuk Seri Najib Tun Razak dan Menteri Perusahaan Utama, Datuk Seri Dr Lim Kheng Yaik.

Menteri dari Indonesia pula termasuk Menteri Kordinasi Politik dan Keamanan Susilo Bambang Yudihoyono, Menteri Luar, Hasan Wirayuda dan Menteri Tenaga Kerja, Jacob Nuwawea.

Mengenai tenaga kerja, Megawati berkata kedua negara juga telah sepakat supaya penghantaran tenaga kerja dari Indonesia ke Malaysia hanya dibuat melalui agen tenaga kerja yang dilantik sahaja.

"Dengan cara ini tenaga kerja ini mudah dikesan dan (kami boleh) memastikan mereka yang baik sahaja akan dihantar ke Malaysia," katanya.

Katanya kedua-dua negara juga bersetuju hari ini untuk bekerjasama dalam bidang keamanan dan bertukar-tukar maklumat mengenai keselamatan.

"Seperti mana anda sekalian maklum, Indonesia sedang membanteras gerakan pemberontakan bersenjata pemisah Aceh sejak tiga bulan lalu dan perlukan kerjasama menanganinya," katanya.

Beliau berkata dalam soal keselamatan, Indonesia bukan sahaja perlukan kerjasama dari Malaysia tetapi juga negara jiran yang lain.

Menurutnya kedua-dua negara juga bersetuju untuk mengambil langkah yang lebih konkrit bagi mengatasi masalah lanun yang mengancam pelayaran di perairan kedua negara.

Mengenai jerebu, Megawati berkata Indonesia sudah menggunakan satelit untuk mengesan kebakaran hutan dan tanah gambut di Kalimantan.

"Kalimantan tanahnya adalah tanah gambut, mudah terbakar jadi kita guna satelit untuk mengesan bibit-bibit api untuk menanganinya," katanya.

Katanya beliau juga sangat berterima kasih dengan tindakan segera Malaysia dalam menghulur bantuan untuk memadam kebakaran hutan di Kalimantan beberapa tahun lepas.

Seterusnya Megawati juga mahu supaya perdagangan antara Malaysia dan Indonesia ditingkatkan.

"Saya percaya banyak potensi yang masih boleh kita jadikan kerjasama yang konkrit dalam bidang perdagangan," katanya.

--BERNAMA

MT AZH